

THOU UN! THOU UN! THOU UN!

As told by Pu T. Thongpau

ZSP Anthem (THOU UN ! THOU UN ! THOU UN !) toh kisai in apaisa October 8, 2011 (Saturday) jingmawng in ZT Editoriale leh Pu Nengchinlam, President, Zou Sangnaupang Pawlpi General Headquarter in Pu T.Thongpau aki houlim pi hi. ZSP Anthem hingpiendan leh akhietna tambang in ahing hilchien hi.

Thou un ! Thou un! ZSP seinou guolte

Kaphuohlai in siemzilna lam ah koima akithou naisih hi. Singngat, Tuining, Sugnu etc, kuol ah laisiem aki um naisih a, (Tuoitengphai HS jong umnailou, Middle School umpan hamham) a ihmu nalai akisuoh hi. Zou tawndan, khandan leh saannemla chilam ah kikhangthou thou nanleh education leh khanletna lam (development) ah ki ihmu nalai or ki khanglou naisih a, a ihmu mil kihi nalai hi. Neukhat atheidawm a inei sunsunte zong ihmu hem akipang nalai uhi.

Tu dinmun neukhat khangtou nanlei IAS/IPS nasan kineijou nailou, sepna lien nei leh kisahtheipi ching kinei nailou ahijieh in bangma kihi nailou in kakoi hi.

Thou un ichi pen- khenkhat BA angzaw uleh sang kisa mama, aban idea neilou, bangchi masawn ding chi a lungtang a um nailou. IAS hithei ding pan zong muzoulou, athawlou zieh ahi. Kei ngaidan in a ihmu kihi nalai.

Thou un chi in religious lamzong a kawh hi. Nidang a Paite bible kijang, convention a ki um, upa ding, tirkouh ding hing kibawl utlou, ingiem dan a hing ki net suhnalai ahi.

Economic lam a kichau mama nalai hi. Lekha sim nading (education) a sum kiseng peilou, zu leina ding a kiphalte ihi nalai hi. Social lam ah- hulai a kuong leh beel sopdan zong kithei lou, kou kava sopsah uh hi nalai. Siengthouna lam ikivat jieh a nap kai nalai in Zou napdoh ahing kichi hi.

I Zogam dam diidiei nibang tan ding

Zogam sung pen lei hoi in, singga louga pieng in, agate ineeh leh ki lungkim mai, ken na sem vang in hausavang chi umlou, 'kei kakiel a ahileh ka upa umna' chi lungtang kinei, a lungsim sie umlou, kingainatna tam in nei- le-lam kizou tuote ihi. Hih umdan in ei ading in khantouna ahing tun sih a, masawna bangma muding a umsih hi.. Sang naupangten masawn sah vai nibang tan van china ahi.

Khang tamtahte muol a liamna

Pi leh Pute hanla sahna nunnop jaidei oina

Hulai a mi khat in sa amat lezong inchin a kikhoh ua, sannemlate sa in, nuam asa mama uhi. Khantouna pen umlou, geelzong geelpha ahisih hi. *Kumkho ningneeh theisen lawmguol toh haulunmang pienna ngailou e. haulunmang zong a jalna mun ah sesum phungching in Zolei sawmtang thou angailou e* ana chi va ia uhi. Khodou ana bawl uh, nungah tangval sannemla sa a ana janhah uhi.

Tu'n ZSP khonvah hihai

ZSPte hi meivah bang a hing kilangte ihi uhi. Khonvah bang a tang ding ihi uhi. Hulai in meila ana kitang in, khonvah athupi mama nalai hi. Hujieh a khonvah toh teekah ahi. Symbolic neideu a kigee ahi.

Igam miel nibang tan ding

Imi isate khuo musah ni, changkang, khanglien sah ni – bangteng (all walks of life) ah khanglou san ni

Thou un! Thou un! Thou un!

Hikhu velkhat a kihante kihilou, vel 3 tan beh kihante ihi uhi. Ikhanmaw bohte thei unla, hing kisa un china ahi. Tulai BA, MA kitam nanleh ikhotang hinkhuo i etchieng in ahithe i naisih hi. I lamkaite entalei- zu leh sa a kimawl thang nalai, *ningju lou in pui theilou chipen* um nalai. Laisiem kichite'n zong laisiem kihisah in, nulehpa vah ding a kikoi ziauzuau nalai, mi etton ding chi geel nailou. Laisiem 'khat kavele, ka dinmun theilou maw' chivel a kiliensah nalai. Khamnei tam lehang zong bangma kihi nailou. Itheiding, imapui ding tam sengseng in hute kibawl nailou. Nam changkang ichi America chivelten tam anthem hengthei ta va, ei ading in, izogam ifan a ahileh tutan a sannem lasa a vuikai den, education leh khanletna lampang geelkha nailou, 'koi nei iva eng de' chivel hi nalai hi. Education line ah a stage sangdeu in – 'ken BA ka pass masang in ji kanei sihdang' kana chi hi. Hinanleh hing ngainatpi ding a umlou jiehi in ahithe ihi sihi.

Tukhang a ka khanglouta hi chipawl in – ama un gamsung khanletna ding in pan la ut nailou, ut lezong pan lapei lou ahichieng un a khanglou nailou ahi. Apil asiem umsunte zong ama uh innsung maimai ngaituo (concentrate) nalai, ama kitumtoh letsah in, nasep sil bangkim a kipe peilou, khotang a bangma bawldohloute ahi ut uhi. Munkhat a buoina khat um hitaleh kibee pai, Pasianthu ah a innvengpa shi- hattuum a kikhen vevaw nalai, 'ama hattuumte hi, ama khote hi, ama beete hi' kichi nalai. Mishi khat a umleh 'koibe ahiei, koi hattuum ahiai' kichi vevaw nalai. Tambang a umlaite ***a thou*** kichitheilou hi.

Tuibang luongin, lungkituoh in

Tambang kidaidanna umlou a lungkituoh a um ka lunggul mama hi. UZO zong UZO a kingalou, aphung a kinga nalai, achi anam a kinga nailou- 'kagam kami bang kachi puodie' chi um nailou in mi panlah ding kineem nalai ibang uhi. Lamka ihaw lezong innkhat a giehi ding in, MLA candidatete INN chivel a *bahara* ding kingen nalai ihi jiehi un *lungkituoh a luongkhawm* ihi naisih uhi.

I Zogam tuisiengte zong lungkituoh in

Tuisieng in mihing lungsim sienna agen ut hi. Lungsim siengte'n mi daidan aneisihi uhi. A tuisiengte zong ama leh ama koima chiil ngailou a tuipi kinawng zuon a lung dieldiel thei ahi uhi. Mihingte damtheina , khotang ngaina, mi dangte itna neite gen utna ahi ban ah, mundang a luongthei ding deina ahi.

Luong dieldiel uh tuipi kinawng juon in

I zogam sung a lunggeel neite, laisiemte izogam tuisiengte ahi. Tuipi kinawng juon in chi pen tup mun KHATLETNA, KIVAIHAWMNA, SIEMNA PILNA, EDUCATION, SCIENCE chite tui kinawng in a huom hi. Tup neilou zong kitam mama nalai, apai utlou zong aki um nalai hi. Eg David VL ZOU khu tuipi kinawng tung khat ahi. Khovel theipi, mipi kingahna thei khat ahing hita hi. Ka kipana asang mama hi.

Eizong luong vai tuipi juon in

Tup leh ngim neivai. Etsahna in katapa hing gen vang. Rs. 15000 kapie a, tup kichien neiding in delhi ah kasawl hi. (sum a umsih leh natang bawh khat ka leiding in ni bangjat ekhat kane nading hi chitan in akingam hi) Pasion hepina toh tu'n Assistant Commandant CRPF ah ahing lawching hi. Tulai laisiem kitam lezong tup leh ngiim nei a lekha sim kitamlou, a umlou toh kibang ihi. Nidang toh iki khietna a umnai sihi. Llaisiemte zong 'aban kang chompeisih hi' chimai nu- leh-pa aki nalai hi.

Lung kituoh in luong dieldiel vai

Sangnaupang pawlpite

Khanlet nalam, sakholam ah, education lam ah lung kituohthei ding in sangnaupangte'n pan lavai.

Khang tamtahte puitu ngaiin mangbang uh

Nidang in Pu Thonghang, Pu Kamzakhup, Pu Kamzakhm leh Pu Semkhopau maimai lamkai in akinei hi. Thonghang zong Nagaland a um ahi zieh in aki zangthei tahtah sihi nalai hi. Bible leding nasan ah mi aki tawm mama hi. Lamkai kitasamte ihi. 1955/6 kum vellai a zong lamkai ki umlou. Recognition ading zong ZOU kahi ding uhi chia ana kipei vilvel ana umlou. Pu Khaikam (SDO a deed writer) lawitoh recognition inei ding hi chi kigen in, hinanleh ami akipeiding umlou. Pu T Gougin pen sepai apanna a lekha ana sim in, Imphal a clerk a anapang a recognition list a etleh ZOU ana panglou in, hu a ZOU ana pangsah hamham ahi bep hi. UZO umnailou in UNITED MANIPUR ZOMI ORGANISATION (UMZO) ana umta.1964 a Gougin BA ahing passed jou in gungallam khawmpi a UZO a hing kiheng ahipan bep hi. Tam pen Gougin leh semkhopau panlahna ahi. Khum hunsung in lamkai/puitu ngai in mi tampi ana muolliem manta uhi.

Tu'n ei Sangnaupang Pawl kisa tavai

Tun ei sangnaupangte'n ilung geel vai in, leader a kipe theitei te'n pan lavai. Lamkai hoi ki poimaw hi. Hinanleh tunitan inzong lamkaithei ding tahtah ki umnailou in kamu hi. Yangmasho Saija in 'NOU ZOUTE LAMKAI THEI INDIA FIGURE OR MANIPUR FIGURE KHAT BEEH UMLE UCHIN NA GAM UH CHANGKANG VA UTEH' ana chita hi. Tuajieh in sangnaupangte ikisah ding apoimaw mama ta hi.

Igam mielin haibang ngahla

Pangchiet va ui, izogam nuom siemtha na'n vaihawm

Asiem masa um sunsunte'n- nang namun ah kei kamun ah chi'n pan lachiet va ui china ahi. Education leh khotang hinkhuo changkang nading (education, social and religion) in sangnaupangte'n panlah a, hoilou a itheite siemtha akul leh poimaw ahita hi.

Tung Pasian hing panpi in ZSPte

Pasianlou a bangma hitheilou, ahivang a tuni tan in Pasian theilou hilei akilawm hi. Mite lungtang ah thu hinggen in, tahsa a theisiemna lampang ah thu hing gen in chia Pasian kung a ZSPte ading a thumna ahi.

Hingpie'n pilna, hoina leh jaidamna

Pilna kipoimaw, hoina ichi chiengleh melhoina, damtheina tanpha huop a, lungsim pichin na, zaidaw theina igenna ahi. Tulai in jaidamna kichi khu akinei nai sih a, kiphu lahtuona lungsim kinei nalai.

Kukal tah a pang chiet ding in

Lawsam talezong lung kelou a Zoute khantouna ding dei a panla tentun chiet ding, mimal khantouna, sakho khantouna leh nam khantouna a pan lading in chi aim na ahi.

Hatna hingpie'n Zomi Sangnaupang Pawl leh puitute

Adieh in ZSP te kung ah atung a quality kigeente hing pie'n chia Pasian kung a angetna ahi. Literature toh kisai in **Zogam Thusuo** akinei masapen hi. Hinanleh, tuhun mabang in, koiman a fee pe utlou in ahing khawlta hi. Literature lam, hamlepau lam leh khantouna lamkhat poupou a totdet hing kisawm zing ahilam ithei naisih uhi. Laisiangthou ineisawm lai a 'laisiangthou neiding ahi' chi sang a' neilouding ahi' chi bang aki um nalai hi. Mizo, Paite etc te nasan in 'laisimpei zong a umsih uh, kou a a umna hi' ahing chikhum nalai uhi. Ineisun 1967 lai a new testament khu ahi. Hulai a Zoukam a letding zong koima kingalou ihi. Lungkiet huoi mama chi loungal gending katheisih hi.

Akhanglouta kisate kung a thuvaihah nuam – natheinate education a namu sunte leh pilna khanletna nanei sunte, na sumsente leh na society ading a zanglou a 'khanletsah jawding zong umsih' chia na kimohtou leh akhanglou nailou nahi nalai hi. Eima society a khanletna inei chiet chieng a khanglou kihi pan hi

ZSP LAPI HILCHETNA

THOU UN THOU UN THOU UN chipen khanglou maimai hilou in mite puiding, atheiloute theisah ding, makai peiloute makai peina ding, tahsa ihmu apat a thawna maimai hilou in, lungsim a silhoi bawl ding a thawna, ahoi apat ahoizaw a puitou ding in gam leh nam ading a nibang a tangding china ahi. Kilaisiem sah, seple bawl a panlah ding ah hing engsih henla, pan hingla leh chi ngaisutna ahi.

Tam la pen koima hingchiil a kabawl ahisih hi. SSPpte khum hunlai in akiha singsah mama ua, mipil mihauten pan ahingla uhi. Ei a pan lading aki umsih hi. **Tuibang luong in lung kituoh** in ka china a khu, **guolle paite muolkhum siengta, ei bang chi ding** chi ka ngaituo chieng in ka hitui aluong hi. Ei vaki ngaisiet ding hilou in, mikhat kahi chi a midangte toh lung kituoh a luong ding kachi ahi. Ama utoh kibangthei ihi china ahi.

A giel hun

Tam lavui hi Churachandpur Government High School ka kailai 1961 January/ February lahvel a kaphuah ahi.

Laisiem koima aki umnai sih a, class X pass zong aki tawm mama nalai hi. ZSP aki form hoi nailou jieh in member zong aki umsih hi. 1961 in Tuining khuo ah ZSP khawmpi ahing um a, khum in pamphlet chivel ah tam lavui kahing giel ua, seal leh bangkim kahing bawl uhi. Khum hunlai in resolution chivel zong ana um vateh sih hi. Hinanleh tam lavui khu ZSP anthem hisah vai chin ka hisah ua, tuni dong in akizang nalai hi.

Ka gensa bang in tuni tan in ZSPte akhanglou kamu naisih hi. Ka tup leh ka ngiim kagente tangtung in kathei naisih hi. Khumjieh in tam anthem pen eihun ading in ahoi mama nalai a, ka visionte atangtun nading in pan hinglatha un chiin kang ngen hi.

Pu T. Thongpau theichien sem vai:

Pu thongpau hih 1940 kum vel in Lungsai(Nungsai) khuo ah apieng hi. apa Vumkthothong leh anu Dimkhochiin tate 7 lah a 4na ahi (tun 2 maimai adam tagiap uhi). Ama 1957 in Tuibuang ah ana teeng ua, tualeh 1959 in Zoveng ana sat ua, tuan ah tutan ana teeng uhi. Tun tapa 2 leh tanu 3 anei hi. aman 1965 kum in class x ana jou a, 1966 kum in Asst Teacher, Education nuoi ah ana sem in, 2005 February in ana pension ta hi. Aji ittah Nh Niangsuanching (Vialzalun leh Vunghat of Sielna tanu) to Rev. Mangdal khut ah hattuum dan siangthou in Zoveng Biehinn ah kinung uhi. Zou angainat sengseng jieh in la tampi ana phuoh a, alate tuni tan in atul naisih hi. Maban issue ah alaphuohte hing kigiel jel ding a, a paraphrase toh hing kitahlang jel ding hi. Koipou ama houpi ut i-um leh houpi thei gige ahi. Ama Zoulai a diary maintain masapen ahi ban ah akiteen ua zong Zoulai (script) a banner giel khat ana hita hi.

Suanlyan Tungnung